



ATASSUT
Steen Lynge

UPA 2016/96
24. 05. 2016

Tarnikkut nappaateqartut ikiorneqarusunnigitsut imaluunniit nappaatiminnik paasinninngitsut tungaasigut tarnimikkut nappaateqartut, peqqinnissaqarfiup kommunillu akornanni attaveqatigiinnerit naalakkersuinikkut sukatarniarlugit qanoq ililluta pitsanngorsaasinnaavugut?

(Inatsisartunut ilaasortaq Agathe Fontain, Inuit Ataqtigiit)

Aallarniutigalugu ATASSUT-mit qutsavigerusupparput Inatsisartunut ilaasortaq Agathe Fontain, Inuit Ataqtigiinneersoq apeqquteqaat aallaavingalugu oqallisissiatut siunnersuummik taamma soqutigartigisumik saqqummiussaqaarneranut, tamannalu ima ATASSUT-mit oqaaseqarfigissavarput.

Apeqquteqaat aallaavingalugu oqallinnissamut siunnersuut una imaannaanngeqaaq aammalu sivirusumik oqallisigineqarsinnaalluarluni. ATASSUT-mit siullertut oqaatigissavarput Naalakkersuisut siunnersuummut akissuteqaatai annertunerusumik uteqqiiffiginatigut tusaatissatut tigugatsigit.

ATASSUT-mit pingaaruteqarpoq inuk kinaluunniit qanorluunniit aamma ilungersuuteqarluni nappaateqarpat sapinngisamik pitsaanerpaamik kiffartuunneqarnissaa aqutissiuunneqartuartariaqartoq. Taakkunungali atatillugu arlalippassuartigut puigorneqartutullu pineqartartut tassaappat ilaquataasut - angajoqqaat, qatanngutit, meeqqat allatullu qaningisaasut.

Taakkuuppummi ulluinnarni annertuunik qanigisaminnut tapersersuerusunnikkut ilungersunartorsiuutinik nalaataqartuartartut, allaallu ilaatigut aamma oqilisaanneqarnissamik pisariaqartitsisartut.

ATASSUT-mit isumaqarpugut tarnikkut eqqarsartaatsikkut nappaatit nunatsinni ersarinneruleriartorneri naapertorlugit aamma eqqummaarinneruleriartorneq naapertorlugu suli amigaatigeqartutut immat nuna tamakkerlugu tapersersoqatigiiffiusinnaasumik kattuffeqarsinnaaneq imaluunniit nunatta avataani kattuffinnut pioreersunut aallarniutigalugu immikkoortortaqqarfeqarsinnaaneq.

Tassuunakkummi tarnikkut eqqarsartaatsikkulluunniit nappaatinik eqqugaasut, toqqaannartumik imaluunniit qanigisaasutut periarfissaqartarmata assigiinngitsutigut qaammarsaataalluarsinnaasunik aammalu ulluinnarni inuuniarnermi sakkussatsialannik ingerlatitseqqissinnaallutik. Tassani assersuutitut taaginnarsinnaavagut kattuffiit SIND - Landforeningen for psykisk sundhed, tarnikkut nappaatilinnut qanigisaasunullu, Psykiatrifonden - tarnikkut nappaatilinnut imaluunniit inuunermi ilungersunartorsiorfimmikkallartunut aammalu Bedre Psykiatri - tarnikkut nappaatilinnut qanigisaasut kattuffiat. Kattuffinni taakkartukkatsinni ilisimasat annertuut pigineqarput arlalitsigut aamma uagut maani nunatsinni pissarsiaqaatigilluarsinnaasatsinnik.

ATASSUT-mit isumaqarpugut pingaaruteqarluinnartutut tikkuarneqartariaqartoq ilaqutaasut allatigulluunniit qanigisaasut pitsaasumik ikorfartorneqartarnissaat taamaattumillu aamma sakkussaqaartariaqarput namminneq ilungersunartorsiorfimmiiilnginnissaat qulakkeerniassagaanni, taakkuullutillu aamma annertuumik ulluinnarni tarnikkut nappaatilinnut ikorfartuisuullutik tapersersuisuusut.

ATASSUT-mit Naalakkersuisunut manna iluatsillugu apeqqutigissavarput nunatsinniit tamakku DK-mi kattuffiit suleqatigineqarnersut aammalu maani nunatsinni tamakku tungaatigut kattuffilerineq imaluunniit peqatigiiffilerineq ingerlanersoq?

Taamatut ATASSUT-mit oqaaseqarluta siunnerfeqarluartumik oqallilluarnissamik kissaassissaagut.

Qujanaq!